

左文襄公奏疏

第二函
十冊

左文襄公奏疏續編目錄

卷三十九

官軍搜捕餘匪獲勝摺

督軍進駐靜甯片

覆陳安插陝回片

遵旨覆陳派兵前赴肅州摺

官軍進剿大勝奪據康家巖要隘摺

餉源中竭懇迅催協解摺

徐占彪啟程赴肅片



左文襄公奏疏續編卷三十九

官軍搜捕餘匪獲勝摺

同治十年七月十二日

奏爲中南兩路官軍搜捕餘匪疊獲勝仗恭摺馳陳仰祈

聖鑒事

臣

於六月十四日將中路官軍

剿賊獲勝暨搜捕西山零匪情形附片馳陳並聲明檄飭各軍上緊搜捕各起零匪在案茲據固原提督雷正綰記名提督周紹濂陝甘道黃鼎報稱周紹濂詞知道目李文虎楊百成等竄至距半角城百五十里之磨盤水地方混入米包山撫回楊萬春金忠明等股內正籌辦間忽於六月初八夜聞李文虎率逆騎數百由西山東竄雷正綰周紹濂黃鼎各率所部馬步隊伍出擊初九日黎明至苦水泉尾果見逆騎東竄官軍攔頭截剿槍轟矛刺斃賊甚多賊敗潰反奔追至五家山李文虎率黨死拒官軍奮力齊追斬步賊七八十名馬賊三十名轟斃者尤衆周紹濂所部生擒李文虎楊天朝等八名雷正綰黃鼎所部生擒賊目馬二楊耳環子等數名奪獲騾馬百餘匹餘賊紛紛潰竄追之不及訊據李文虎供稱五月初六日由河州帶馬隊九十名出竄到楊萬春處伏匿今日接仗楊萬春楊百成金忠明一併在內等語臣查李文虎楊天朝馬二楊耳環子等逆均係違誅積匪批飭軍前正法梟首示衆楊萬春金忠明等就撫復叛罪不容誅飭令迅速剿辦以昭炯戒雷正綰周紹濂十一日會軍繼進分道直搗米包山一帶賊巢官軍齊抵米包山賊猶未覺即縱隊痛擊搜獲旗械號衣軍火甚多巢賊無得脫者其先時出巢劫掠之賊

百餘名聞警回援又經官軍擊敗獲牲畜百餘頭訊生賊供李文虎眷口尚在河州本日官軍所殺皆楊百成楊萬春金忠明丁萬明之黨內有馬化澂戚屬譚竹林亦已伏誅此各軍追捕西北逸賊續獲勝仗情形也又據提督楊世俊稟稱駐三陽川之奇捷平西營務處副將楊德俊探知秦州平南川有馬步賊東趨甘泉寺卽帶馬隊三旗會田連考步隊尋蹤追擊十一日於秦州麻山頭地方始與賊遇馬隊斃賊數十奪驛馬器械甚夥追奔六十里至麥積巖兩山峻削對立賊急棄馬上山官軍亦改步齊登斬賊數十名奪馬數十匹餘賊鼠竄因天晚雨驟覓地暫憩十五日黎明追七十里至黎子園又斃尾賊數十名此股略盡矣訊據生擒賊供鞏昌回目劉洪逃走河州後茲夥繞由安定潛來謀劫糧運現已死亡大半劉洪亦經官軍陣斬又駐渭東之平西營都司王勇於十五日訶知賊與平西後營接仗卽出所部馳至汪家衝與後營夾擊賊卽敗退追二十餘里斬馘多名奪驛馬七十餘頭旗二桿槍矛數十件餘賊四散生擒賊目閻得順馬遇逢訊係小頭目馬五所帶已爲官軍擊散此楊世俊所勦竄秦州之回及在渭源所屬汪家衝擊賊獲勝情形也同時提督張仲春亦探有步賊百餘竄至閻井一帶卽出隊向馬塢鎮截勦該逆聞風折竄岷州適岷之副將張登桂於十五日帶隊來駐洛門領糧遇賊於岷屬大坪賊方伏山凹似圖劫運張登桂分隊搜剿斃賊十餘名奪驛馬十餘匹賊遂狂奔十六日竄至駐馬塢六十里之百家莊張仲春卽於二鼓潛師掩擊五鼓抵百家莊乘賊酣睡將全股圍斬殆盡奪牛馬二十餘匹器械旗

賊甚多十七日探知前在禮縣屬擊敗之賊百餘騎又由西河境繞道固城有竄馬塢之勢張仲春飭信營回駐馬塢自帶禮義兩營躡擊賊見官軍即飛向馬塢竄去官軍夾擊轟斬不計其數奪驟馬四十餘匹矛桿二十餘枝賊翻山亂竄時已四更矣山霧冥蒙不辨行徑次日探之則已紛紛逃竄無蹤遂於廿日回防此宗岳各營剿賊岷屬獲勝情形也其階州剿辦緝匪情形臣已於六月十四將三四月內攻拔段世才李奎石巖洞各處堅巢陳明在案茲續據署階州知州洪惟善稟稱縣丞李支瑞探得史家溝有窩藏緝匪蹤跡即親率隊伍馳往搜捕匪目史夢虎遂竄匿何中幅堡中並恃其黨趙金幅夥同助逆李支瑞商請哨官彭得沅周正秋賀俊德等率隊於五月初五日抵何家溝傳諭何中幅令其縛匪平堡繳械免死該匪竟敢抗拒官軍鏖戰自辰至申始將後卡攻破斬匪八名奪劈山礮線槍數件而前卡懸巖峭壁力無所施逐日輪攻互有傷損初十日該縣丞令各隊執擋牌直抵卡外積薪縱火當毀卡前礮樓匪勢益形窘蹙十一日五更潛竄出卡官軍圍擊斃悍匪三十餘名生擒要逆趙金幅等數名起獲大礮三座線槍八桿刀矛數十件牲畜十頭據趙金幅供史學虎已於前兩月逃往白馬關詢段世才蹤跡則堅不吐實當將該逆正法並移咨白馬關州判嚴拏史學虎訊辦此階州剿辦緝匪獲勝情形也臣維中南兩路疊次追剿擒斬頗多剿辦緝匪亦多擒馘惟首逆狗齒牙馬彥濤及緝匪匪目史學虎等尙未就殲現仍飭確探迅剿務盡根株所有剿辦零星回賊並攻拔緝匪堅巢疊獲勝仗各緣由謹彙案據實陳

明伏乞 皇太后 皇上聖鑒訓示謹 奏

督軍進駐靜甯片

同治十年七月十二日

再鹽固一帶羣匪經疊次搜獲所餘無幾惟數十騎一起十數騎一起者西山以內倏隱倏現時復有之緣地闊山荒煙戶絕少零賊見兵卽逃轉盼無蹤搜捕難於求速也臣現咨雷正綰撥所部馬步九營分紮固原迤北至中衛南境飭平慶涇道魏光燾撥所部馬隊一起步隊五營延紮固原迤南至平涼旁接隆德以資雕剿而護餉運現已到防記名提督徐文秀已進駐會甯劉明燈已進駐安定臣拜摺後卽率親兵進駐靜甯州到靜甯築營後當卽率輕騎馳抵安定狄道一帶察酌情形督令諸軍分道速進所有微臣啟行日期理合附報伏乞 聖鑒謹 奏

軍機大臣 字寄同治十年七月二十日奉 上諭左宗棠奏中南兩路官軍搜捕餘匪疊獲勝仗並

率軍進駐靜甯各摺片雷正綰等軍追捕西山逸賊擒斬賊目李文虎等多名楊世俊所部截剿秦州竄回並在渭源所屬汪家衝擊賊獲勝將回目劉洪等陣斬其紛竄岷州之賊亦經張仲春等督兵截擊擒斬頗多至階州縉匪亦經該處員弁率隊進攻破其卡壘殲斃悍匪數十名卽著左宗棠嚴飭在事各軍認真搜剿並將逃首逆狗齒牙馬彥瀝及縉匪史學虎等悉數擒獲淨絕根株左宗棠進規河州現今雷正綰撥馬步九營魏光燾撥步隊五營分紮固原南北各路以資雕剿而護餉道令徐文秀駐會甯劉

明燈駐安定該督自率親兵進駐靜甯所籌均尙周密卽著於行抵靜甯後馳赴安定狄道一帶察看情形督率諸軍分道速進擒渠掃穴迅奏膚公以慰厯系將此由五百里諭令知之欽此

覆陳安插陝回片

同治七年七月十二日

再金順張曜等前解陝回六百餘名赴靈州安插據駐金積堡提督蕭章開署靈州知州王翔稟報已分地安插矣察看現在各處遷徙安插各回民均尙安靜守法間有漢民藉詞報復者臣已飭府縣隨時懲辦斷不令仍蹈惡習致啟弊端上煩

廑慮謹據實覆陳伏乞

聖鑒謹奏

軍機大臣 字寄同治十年八月初一日奉

上諭左宗棠穆圖善豫師奏礮伯剿匪獲勝南川被匪

竄擾左宗棠穆圖善奏堵擊西甯賊匪各摺片覽奏均悉陝匪崔三等竄擾礮伯之勝番溝等處並礮礮城經官軍連日進剿將賊擊退平戎一帶肅清勦辦尙爲得手在事尤爲出力各員著左宗棠等查明保奏該逆全股焚壘而遁究竟竄往何處著左宗棠穆圖善豫師嚴飭各軍探明賊蹤合力搜捕務絕根株逆首崔三是否實係擊斃著該大臣等確查具奏西甯逆匪四出竄擾密洞等處雖疊經擒斬匪勢仍屬蔓延左宗棠務飭派出官軍分投剿辦迅掃逆氛並檄飭總兵黃武賢嚴密布置務將威遠一帶完善之地妥籌保全至金縣平番及省城附近各隘著穆圖善令帶兵將弁實力巡防毋稍大意成祿在肅州收撫陝回潰叛東下甘涼二府戒嚴著左宗棠穆圖善卽飭王仁和等加意防剿如兵力尙屬不敷並著左

宗棠酌量撥兵策應陣亡之金縣團總四品銜楊增全著交部從優議卹西甯南川一帶村莊時被賊匪焚掠豫師以兵力難分已函商左宗棠撥軍助剿卽著該大臣酌撥得力隊伍前往協助豫師卽飭練總張煥奎先行派隊救援以資保衛甯靈一帶雖經肅清惟聞甘涼回匪勾結西甯漢回屢擾平番古浪等處日久無可掠食或由古浪之大靖土門越中衛而出邊或由鎮番竄出邊外肅州之回亦時由金塔寺出邊竄擾若不預籌堵截恐各匪紛紛北竄必致滋蔓難圖刻下大軍進規河州若以一軍分紮鎮番金塔寺等處斷賊出邊之路以一軍駐紮平番扼西甯賊匪出竄兼護秦旺川糧運俾大兵專力河州免致牽掣似於局勢較為周密著左宗棠酌量情形妥籌辦理將此由六百里各諭令知之欽此

軍機大臣 字寄同治十年七月十八日奉

上諭左宗棠穆圖善奏回匪竄擾北山官兵截剿獲勝

一摺北山秦旺川一帶產糧最廣現值收穫夏麥之際該匪時出竄擾雖經各路官軍截剿獲勝惟據生擒賊供有米拉溝撤回勾結陝回二千餘人分股回竄意圖搶糧等語尤應先事預防力爲保護左宗棠穆圖善督飭各軍分路確探何路有賊向何路截剿務期護民收穫勿齎盜糧穆圖善現已馳往北山著卽相機調度並將該處駐紮馬隊重加整頓以期得力將此由六百里各諭令知之欽此

遵

旨覆陳派兵前赴肅州摺

奏爲遵

旨覆陳仰祈

聖鑒事竊

臣於七月二十五日欽奉

寄諭據總理各國事務衙門奏

俄國西悉畢爾地方官由銅線致該國駐京公使信函內稱七河省巡撫廓派兵前赴伊犁五月十七日將伊犁代爲收復等語並聞俄人尙欲帶兵前往收復烏魯木齊本日已諭令金順奎昌等查明確實情形並令榮全前往收回伊犁城池妥籌布置令景廉帶兵相機規復烏魯木齊矣成祿本係烏魯木齊提督著卽統率所部出關與景廉會合力圖收復所有該軍餉需著戶部遵照前旨迅速查催並寬爲籌撥以資飽騰肅州一帶關係緊要著左宗棠迅卽調派勁旅前往扼剿竄匪替出成祿一軍出關剿賊毋得以兵力不敷稍形推諉劉銘傳所部已諭令鼓行而西繞赴蘭州北路由甘涼肅一帶出關節節前進爲收復新疆各城之計左宗棠身任兼圻本應統籌全局況鎮迪一帶係該督所轄尤當妥籌兼顧諒該大臣必能力任其難以紓朝廷廑系穆圖善如有可撥之兵並著會商左宗棠酌量調派以資厚集欽此臣跪聆之餘曷勝欽佩以隴中局勢論自宜先規河湟杜其紛竄然後壹意西指分兵先扼玉關斷其去路乃策全功此時興師遠舉尙非穩著然此時固有未可拘執者臣接奉 諭旨已飛緘穆圖善詢其能否派隊一面咨劉銘傳酌定進兵道路一面飛飭記名提督哈西巴圖魯 賞穿黃馬褂徐占彪統

所部馬步十二營由靖遠防所取道蘭州踰涼甘兩郡以抵肅州緣徐占彪勇敢能戰所部多百戰之餘尙堪當一路之寄而該軍餉事已經清算臣復擬資以兩月滿餉冀可收飽騰之效其餘占彪所遺靖遠防務甚關緊要臣已檄飭蜀軍統領黃鼎派營員張玉文統帶移駐合併陳明所有遵 旨派撥情形

謹據實覆陳伏乞

皇太后

皇上聖鑒訓示謹

奏

軍機大臣 字寄同治十年八月初八日奉

上諭左宗棠奏派軍前赴肅州一摺新疆軍務朝廷本

欲俟甘省大定次第籌辦此時勢難置爲緩圖前令劉銘傳一軍由甘涼肅一帶出關昨據覆奏河湟未靖轉餉艱難江皖之人又不宜衝寒涉遠該提督仍請賞假養病業已有旨賞假一箇月在營調理一俟病體就痊卽令督率所部前赴肅州屯紮毋庸出關以便成祿等一意西行惟關外事機緊迫劉銘傳須俟病痊再行拔隊前進尙恐緩不濟急朝廷正深焦灼茲據左宗棠覆奏遵派提督徐占彪所部十二營由靖遠取道蘭州實能力顧大局該軍旣堪當一路之寄著卽飭令迅速前進不得因有劉銘傳屯紮肅州之旨稍涉遷延一面咨催成祿先行部署一俟徐占彪到後卽令成祿拔隊出關並將起程日期奏聞肅州防剿事宜卽責成徐占彪妥爲籌辦將來劉銘傳到肅後亦可商同布置成祿現在出關糧餉最關緊要該軍雖有轉撥之餉深慮各省未能如期解到左宗棠亦當代爲籌畫隨時接濟俾利師行本年正月間據奎昌等奏稱綏來等處民團可用當諭令左宗棠或派員出關或飭口外鎮道妥籌安撫該大臣究竟如何籌辦倘派往之員因道路梗阻未能西行卽可隨同徐占彪大隊赴肅並與成祿一同出關將該處民人加意撫綏務使各團樂爲我用以收指臂之效將此由六百里諭令知之欽此

官軍進剿大勝奪據康家巖要隘摺

同治十年八月二十九日

奏爲官軍分路進剿大獲勝仗奪據康家巖要隘恭摺馳報仰祈

聖鑒事竊蘭州軍行驛道東由會

甯靜甯隆德出平涼以達陝西馱行間道東南由秦州以達陝西而安定綰轂兩路居其衝要頻年回氛

蹂躪受害最酷東道因之不通

臣

宗棠於七月二十九日由靜甯率輕騎取道會甯八月初二日馳抵安

定接見統領後路全軍提督徐文秀統領左路全軍提督劉明燈詢商一切知鹽固甯靈一帶敗殘回逆

及鞏郡土著各回皆寄眷屬於河州各賊巢分起四出剽掠每數十騎爲一起避兵而行颯疾如風伺便

行劫不但商旅文報常有梗阻之虞卽餉糧軍火亦時防疏失自渭源狄道克復後河州諸賊出巢剽掠

必由洮河西岸三甲集渡東岸康家巖然後分竄金縣安定會甯或東趨鹽固或北擾靜遠是安定爲賊

跡出沒之衝途而康家巖又賊蹤必因之津要比卽定議徐文秀一軍由安定西北峴口出金縣稱鉤驛

以達站灘劉明燈一軍由安定東南馬家河韓家坪出關門口內官營抵站灘與徐文秀合隊以攻康家

巖初四日各營先發初六日徐文秀劉明燈由安定拔營繼進令每進一處各派隊分支包掃而前驅賊

併歸康家巖然後聚而殲之初七日徐文秀途遇竄遁之賊數起揮軍縱擊斃賊數十名擒賊目馬得雲

等二十四日總兵陳海俊副將陳締高同時掃花峴子伏賊斬賊數十擒賊目武邦賢等十五名均訊明

正法初八日由好麥川楊婆廟一帶躡追而前登嶺瞭視羣賊馬步約二千餘正紛紛竄走徐文秀磨所

部各營分途截擊斃賊百餘至沙合嶺大雨收隊是夜雪霰交飛初九日冒雪馳抵黃石坪去站灘四十

里人馬疲困不能前進詢悉由黃石坪逕抵康家巖路較捷遂改道不赴姑蘇之約初十日逾馬寒山至下營子則距康家巖僅三十里矣其劉明燈一軍初四日由馬河一帶向西北折而南趨沿途略有斬獲是日抵柳林溝十一日寅刻劉明燈令總兵黃宏藻劉正高參將楊正茂各帶所部由三十里鋪新田鋪沿洮河東岸前進飭參將殷得益都司鍾鳴鳳參將羅瑞秋副將鄧得勝由大營坪斜抄而前徐文秀率總兵鄭守南參將劉仁和由魏家河出賀家溝總兵沈玉遂率陳締高陳汝俊由大營坪出東溝合攻康家巖是日已刻行距康家巖數里逕薄賊卡堡賊千餘見官軍逼近出卡抗拒徐文秀列隊迎擊而陳締高等已由東溝抄出賊後矣康家老巖堡中復出步賊數百來援洮西騎賊二百餘亦渡河助勢徐文秀令鄭守南陳汝俊陳締高劉仁和等分支兜擊陣斬悍賊二百餘名步賊縮退入卡馬賊見勢不支急上船西渡正爭渡間官軍薄之溺斃無數卡賊憑牆放槍死拒弁丁傷者數人軍士愈憤同麾而登立破其卡斃賊約三百人生擒賊目哈章布等五名餘賊退入大堡劉明燈一軍是日甫出柳林浦口卽遇馬步賊數百揮隊擊之斬賊數十賊敗入新田鋪合守卡賊併力穩抗適殷得益鍾鳴鳳羅瑞秋鄧得勝等從大營坪橫截而出賊敗狂奔各營奮威衝殺陣斬百餘名賊退入康家新巖及孫家堡劉明燈率馬步各營躡蹤壓迫立將兩堡攻破斃賊二百餘生擒十一名餘賊叫號亂竄各堡賊亦相率潰奔併入康家大堡其渡洮西竄者均遁入急溜中溺斃無數徐文秀劉明燈兩軍既合卽下令布圍康家大堡及各小堡

分撥甫定大堡內賊穴牆衝出各堡賊亦皆棄堡向洮河亂竄官軍分途追逐沈玉遂王前程橫出截殺斃賊最多計是役破大小莊堡十餘處陣斬溺斃之賊約二千數百名徐文秀劉明燈卽分據康家新巖孫家堡康家大堡立營訊據生擒賊供賊首馬爾和哈然麻已斃於陣矣十三日派隊搜山至距康家巖二十里沙礮子地方復斃賊百餘名溺斃無數此官軍連日冒雨進剿踏平康家巖莊堡奪據要隘實在情形也竊維康家巖在洮河之東距省城百數十里距狄道州五十五里對岸十里卽三甲集雖屬狄道轄境而實河州門戶由三甲集而西卽太子寺大東鄉等處均逆回麇聚之所洮河西岸山高徑險賊勢亦較中左兩路爲重必過河立營然後可戰必架造浮橋然後可渡現值秋霖疊降霜雪交加之時萬壑爭流岸闊溜急狄道架橋船隻纜索均已製造齊全康家巖則尙須併力經營乃可集事一俟水退橋成卽當渡洮進剿臣穆圖善十六日來安定與臣宗棠籌商機宜意見相同旋卽回省布置謹合詞馳報伏乞 皇太后 皇上聖鑒訓示施行謹 奏

餉源中竭懇迅催協解摺

同治十年八月二十九日

奏爲餉源中竭危局難支懇

恩迅催協解以利戎機而免決裂仰祈

聖鑒事竊維西征協餉奉

撥之數本不敷用而各省關除江西閩海關外均解不足數以故積欠纍纍至今已一千二百萬兩辦理西征糧臺侍講學士袁保恆目覩艱窘情形函咨並達穎亮脣焦不得已請

旨嚴催蒙

聖明慈

鹽諭飭各省關新舊並籌各省不但新餉無增卽舊餉亦多延不照解臣軍所收協餉祇有此數而穆圖善豫師及甘肅舊有各軍營餉需均須由臣軍墊給且間有奉 旨飭西征糧臺墊撥之款臣軍餉事

來源日減銷路日增而兵事則局事愈寬待用愈急以故向章每年各營發三箇月滿餉上年僅發兩箇月今歲則端午中秋尙未能發卽年節一關尙未卜何如矣此本軍士應得之餉銀然有則速發無則緩發諸將士諒臣有素或無異詞惟糧食鹽菜衣袴巾履醫藥則生人日用所需決難斷缺非時其緩急源源支給慈父且不能保其子將帥安能蓄其士卒哉且陝甘頻年兵燹子遺僅存往往數百數十里人煙斷絕新復之地非俵給牛種賑糧則垂斃之民勢將盡填溝壑各省克復一郡縣收一處丁糧釐稅甘肅克復一郡縣卽發一處牛種賑糧非是則有土無民 朝廷亦安用此疆土他如城池宜修地方宜設官採糧轉運軍裝宜設局已撫回民宜給賑所有薪俸經費賑務師行一處卽增一處之需而皆仰給於此臣不敢列款上請不得不於軍餉挹注早爲補救此皆陝甘兩省官吏士民所共知者金積底定進規河湟甘肅局勢雖有轉機而臣憂慮方深正以協餉不時至臣軍出款日增入款漸減必將有不能敷衍點綴之勢臣不得已飭上海採運局向華商籌借銀六十萬兩約以各省協餉到上海時分期扣還復刊行印票搭發各處糧價訂期四十日六十日持票取銀聊資周轉如踰期無銀應付失信商民則並此亦不能行矣撫臣蔣志章稔知窘情於無可籌畫時慨允飭司庫借提銀十三萬兩候餉到歸款暫雖借此

數衍然上海借款僅資應付印票轉運費用及撥還陝西庫款臣軍餉事仍是茫然恐大局決裂終所不

免伏查各省奉撥之款皆部臣總核各省出入數目酌量指撥原非強以所難疆臣心存體

國誼在

奉公如果易地以觀則協餉似亦不催自急合無仰懇 皇上天恩申諭各督撫關差仍遵前 旨

按照欠數力籌新舊並解以濟急需而措危局不勝迫切待 命之至至各省協款欠數若干西征糧

臺開單具報在案部臣無難按籍而稽內如安徽一省經前署撫臣吳坤修籌定指撥有著之款吳坤修

卸任後即停止不解而所派西征金運昌一軍由臣籌墊餉銀十一萬兩牘催解還竟置之不答揆之情

理似有未合河南一省月協甘餉二萬五千兩數年之久僅解過兩次積欠至一百四十萬有奇上年冬

間欽奉 諭旨提解積欠十萬兩該省僅解過二萬兩而下欠八萬兩竟不復解撫臣有無畛域之見

臣不敢知藩司劉齊衡曾任陝西道員襄理軍需局務於甘肅窘迫實在情形不得諉為不知而職守一

分即便悍然不顧亦實非大局所宜此尤臣不能無言者也謹一併據實陳明伏乞 皇太后 皇

上聖鑒訓示施行謹 奏

軍機大臣 字寄同治十年九月初十日奉 上諭左宗棠穆圖善奏官軍進剿獲勝奪獲康家巖要

隘一摺左宗棠由靜甯會甯馳抵安定察看地勢賊情知安定為賊蹤出沒之衝途而康家巖又賊蹤必

由之津要督飭徐文秀劉明燈各軍分路進剿疊有擒斬乘勝合圍將康家巖莊堡全行攻拔殲斃賊匪

二千數百名陣斃賊首馬爾和哈麻然官軍卽分據康家新巖等處立營以扼衝要現值秋深水退之時左宗棠務當飭令前敵各營迅架浮橋渡過洮河節節攻剿迅奏膚功穆圖善與左宗棠籌商一切意見相同現已由安定旋省卽著將省城防守事宜妥爲布置左宗棠請催各省協餉一摺已諭令各該督撫等迅速籌解矣將此由六百里各諭令知之欽此

徐占彪啟程赴肅片

同治十年八月二十九日

再徐占彪馬步十二營邊

旨前赴肅州臣

於前月二十七日拜摺後卽飭駐陝軍需局籌備兩月餉

需以資裹帶復飭甘肅軍需局酌將甘涼兩府屬運省糧石分別劃留以便支領一面飭徐占彪來營將欽奉 寄諭宣示並詢商一切徐占彪尙能體會毅然請行於本月二十四日率所部馬步九營移駐

蘭州金家巖候餉據駐陝軍需局稟已與陝西軍需局湊解銀四萬三千兩俟在途協餉續到立卽補解大約九月初旬徐占彪一軍可由蘭州起行矣其留靖遠之提督黃虎臣三營俟道員張玉文接防卽由靖遠逕赴蘭州會隊前進欽奉八月初八日 諭旨已恭錄行知徐占彪矣至奎昌等奏稱綏來民團

可用前奉

諭旨後已飭口外鎮道妥籌安撫迄今尙未接其稟復近接各軍稟報肅州撫回復叛成

祿力不能制紛請派援成祿函報亦同之徐占彪兵到肅州卽有戰事委員暫難出關也謹附片覆奏伏

乞

聖鑒訓示謹

奏